



Minggu, 17 Januari 2021

Ogen: Masmur 127: 3-5



Anak Jadi Pasu-Pasu



Jabu si mbaru si enggo ngaloken pemasu-masun i bas Tuhan Dibata, tentu merincuh ngaloken tuah i tengah-tengah jabuna. Enda jadi pertoton pe i bas warina ia ipasu-pasu. Sura-sura enda labo terjeng jabu si mbaru ngenca ngarapkenca tapi rikut orangtua bage pe sangkep nggeluhna. Emaka ope denga zaman covid mbarenda, asum kita pulung-pulung denga i bas jambur guna erkerja, kerina sangkep nggeluh ngerana bas wari peradaten perjabun jabu simbaru e “Jumpa bulan ras matawari me kam, jumpa si nangkih mayang ras si nutu cimpa.” Si ertina jumpa tuah anak dilaki ras diberu. Kata ras toto sangkep nggeluh e kerina jadi pengarapen pe man keluarga si mbaru erjabu.

Payo, kita banci erpengarapen, banci ertoto ras mindo man Dibata gelah jumpa tuah, tapi situhuna Dibata nge si merekensa rikutken akapNa payo. Deba pertoton e minter dat jababpen, pedas jumpa tuah, deba ertima 2, 3 seh 5 tahun maka jumpa tuah, deba ka 10 tahun nimai lenga ka jumpa. I je tangkas man banta maka anak e Dibata si merekensa, i bas Tuhan nari rehna. Si jadi perenungen, kerina nge orang tua meteh ngataken bujur man Tuhan i bas ia ngaloken tuah i tengah-tengah jabuna? Adina ikataken anak eme pasu-pasu i bas Tuhan nari, uga nge sikap orangtua nandangi anak?

Pengarapen maka anak e pagi jadi anak panah si mbisa, megegeh, hebat, i bas erti pentar, pang encidahken kebujuren ras menegakken keadilan, nggit ras ngasup nehken kekelengen ku sekelewetna, ermediate man keluarga gereja ars masyarakat. Ia pagi jadi kalak si erwibawa ras meherga. maka banci bage anak e, la banci lang tan orang tua mbelin ngaruhna i je. Uga orang tua jadi pendidik, si mereken usihen ras pengajaren, terlebih mabai anak e reh ndahi Tuhan, gelah segedang geluhna ia pe malang man Tuhan. Sabab e me ulu kepentaren si ialokenna bas kegeluhenna.

Perlu si inget maka anak-anak e labo terjeng pelengkap kebahagiaan orangtua tapi anak-anak pewaris dahin manusia i doni enda e me pekena-kena ras njagai lingkungenna tetap sehat, aman ras sejahtera. Jadi anak e eme teman Dibata nehken keleng ateNa man doni enda.

